



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tir_yimiyim



tir yimiyim

TAPAK 8



Ato kilonser Modi-i July ita nung Australia semdangtsü

2026 FIFA World Cup nung Iran asayatetsü: US



FIFA WORLD CUP

VOL. XXIII ISSUE NO. 191 (ADOK 191) DIMAPUR KÜPTOKNÜ (SATURDAY) RONGCHII (APRIL) 25, 2026 ₹ 5.00

Dimapur nung "Viksit Nagaland @ 2047" atema senden amen

Dimapur, April 24, 2026 (TYO): April 24, 2026, nü Dimapur nung "Viksit Nagaland @ 2047" Vision Document atema District Stakeholder Consultation agiogo. Nagaland sorkari Viksit Nagaland @ 2047 atema asalentong renemtsü asoshi iba consultation agiogo.

Dimapur Deputy Commissioner Dr. Tinojongshi Chang, NCS-i külemi sentong renemtsü aser sendaktepa alir ajak dena district renloktsüba mangdang renemtsü ayongzük. DC Dr. Tinojongshi-isa heads of departments, sendaktepa alirtem aser civil society züngsemtemi tebilemba balala lemsatepba atema pelaba metetdaksü.

"Iba planning maparen ya Sustainable Development Goals

(SDGs) den liromedema lir aser Dimapur district renloktsü. Asenok külemi yaritepa district administration-i tarutsü asoshi asalentong tajung ka renemtsü" ta Dr. Tinojongshi-isa ashi.

Iba sentong nungsa sectoral assessment overview liasü aser idangji CEO DMC, EE PHD, EE Power, Social Welfare, District Employment Office, aser DFO department temi Economic Development, Social Development, Environmental Sustainability, Infrastructure Development aser Governance & Institutional Strengthening dak ajemdaker osang tatsütsü lemsatep.

2047 tashi nung Nagaland renloktsü mangdang ataloktsü atema iba sentong agiogo. Sentong nung mendenji EAC, Dimapur Intijungla liasü.

NEC-i 2025-26 nung Rs 1,496.78 endok

Dimapur, April 24, 2026 (TYO): North eastern state ti asoshi regional planning aser development atema tongti telok North Eastern Council (NEC)-i tan financial year nung Rs 1,496.78 crore endokogo.

Sentong endokba nung Schemes of NEC (SoNEC) kübok Rs 792.12 aser North East Special Infrastructure Development Scheme - Roads (NESIDS - Roads) kübok Rs 704.66 crore densema lir.

2025-26 tsüingda NEC-i mapatong tasen 54 inyaktüsü asoshi senotsü lemküksü aser item mapa ya higher education, health infrastructure, industries, agriculture & horticulture sector, tourism development, livelihood, cultural preservation projects asoshi liasü. Item mapatong nung

Rs 435.22 crore endok aser cultural festivals, international/national/regional seminars, workshops, awareness programmes amala non-project activities 162 nung Rs 24.06 crore endok.

2025-26 tsüingda Rs 678.85 crore alangba mapatongtem renemogo aser Rs 17.28 crore alangba non-project activities 161 (festivals, seminars, workshops, awareness programmes, etc.) tembangogo.

Ministry of Development of North Eastern Region-i NESIDS-Roads kübok state 8 nung Rs 3,037.39 crore alang road projects 64 atema senotsü agütsü. 2025-26 kija nung NESIDS Roads asoshi Rs 704.66 crore endoka liasü.

Ukhrul nung Kuki-Naga rara nung nisung 5 süogo

Imphal, April 24, 2026 (Agencies): Manipur kübok Ukhrul district nung Kuki aser Naga teloktem tsüingda mepetmesü adoker rarayonga aruba Hokolbarnü tamajungba kümogo.

April 18 nungi Kuki aser Naga nung tsüingda raradang nisung pungu taküm samaogo.

Mullam aser Shongphal yimtsüngtem nung telungpurtemi amakdang Kuki nung village volunteer ana khaset.

Tanü nikongdang 5:00 ako meta tena mang nung injang zübotem keter angu. Item tesem nungsa ki ana mi agi rongdoktsür liasü.

Külen Ukhrul district kübok Sinakeithe yimtsüng nung Tangkhul Naga nung Horshokmi Jamang (29) khaset.

Horshokmi ya Kamjong district kübok Chatric Khullen

nung Village Guard ka liasü ta ketdangtsürtemi ashi.

Iba osang zülu tashi nung Kuki volunteer ana maitsü ano memetet liasü.

Tensa tamajungba küma meyoxtsü atema security forces mapa talila lemküksüogo.

April 18 nü T.M. Kasom anasa National Highway-202 nung Tangkhul Naga civilian ana khasetba sülen kin ana tsüingda mepetmesü adoka rarateper.

Tangkhul Naga nung ana tepsetba atema nübertemi lungkak ait, internet services khen atema shibang aser Naga nung alidak mokdang liasü.

Tangkhul Naga Long (TNL) aser Kuki Organisation for Human Rights Trust (KOHUR) dena civil society organizations-i aremkükteptsü aser tensa süngjemsü atema mepishia metetdaksüogo.

Nagaland nung menoknok anokba aser air raid jilu aitsü



nsdma.nagaland.gov.in
Nagaland State Disaster Management Authority
Government of Nagaland



NEPEX 2026 8TH EDITION

STATE-LEVEL MOCK EXERCISE

Kohima, April 24, 2026 (TYO): April 30, 2026 nü Nagaland nung NEPEX 2026 nung shilem ka ama 7.7 magnitude menoknok aser air raid scenario jilu aitsü.

Nagaland State Disaster Management Authority (NSDMA)-i 8 buba Nagaland Emergency Preparedness Exercise (NEPEX) ayonga agütsü.

Iba sentong nung National Disaster Management Authority (NDMA)-i teyari agütsür aser district balala nung mock drills ajanga emergency response tendangtsü. Tan mezüing atema civil defence blackout exercise agütsü.

"Nagaland ya Seismic Zone V nung adener aser iba ya India nung 'highest earthquake risk category' lir" ta NSDMA Secretary Sentiyanger Aier-i ashi.

Nagaland nung disaster preparedness tendangtsü, inter-agency coordination akangshitsü aser emergency response systems tajungba akümtsü asoshi NEPEX agütsü ta pai ashi.

Iba asoshi April 22 nü capacity-building programme ka agiogo aser April 29 nü State

Emergency Operations Centre (SEOC) nung tabletop exercise ka agütsü. April 30 nü main mock drill nung district balala nung response teams aser coordinated emergency actions adentsü.

Taküm sentong nung shilem tasen ka bendenlokbaji "Operation Night Guard" lir aser iba civil defence drill ya April 30 nikongdang 6:30 ako nungi tenzüksü. "Operation Night Guard" ya Dimapur, Kohima aser Mokokchung densema civil defence districts 10 nung air raid scenario alitsü aser public response o emergency protocols asadangtsü atema 15-minute blackout alitsü.

"Iba exercise nung menoknok tesashi ka anokba ama asütsü aser menoknok tiyingsüji Pifima asütsü. Dimapur, Kohima aser Mokokchung dena tongti district tem nung mi lendong, anentsüh, Dimapur, Kohima and Mokokchung chirepba aser nisung aika asüba jilu aitsü" ta NSDMA CEO Johnny Ruangmei-i ashi.

Iba mock drill nung Dimapur district nung nisung 17,000 tema asüba, 5,000 tema yiruba aser nisung 88,000 jungnüa talidak mali

akümba ama aitsü. Iba simulation ajanga hospital capacity, relief camp management aser disaster response logistics tendangtsü ta pai ashi.

"Air raid drill ajanga response time, inter-departmental coordination aser fire, medical, police o rescue teams dena emergency services asadangtsü" ta Commandant General of Home Guards and Civil Defence Medozhalie Pienyu-ia ashi.

Night Guard drill atema civil defence districts 10 ji Dimapur, Kohima, Mokokchung, Wokha, Zunheboto, Mon, Phek, Tuensang, Peren aser Kiphire lir ta paisa ashi.

Civil defence wardens, NCC, NSS aser scouts dena trained volunteers 3,600-i sorkar department tem, NGOs aser lokti balala den mock drill nung shilem agütsü ta ketdangtsürtemi ashi.

Iba exercise ya lendong tulu kar ataloktsü meteter agirba masü saka renema alitsü aser petsaprong masütsü asoshi renemshitsü atema dang lir. Anungji public-i amalitepa shilem agütsü ayongzük ta NSDMA-i osang jangjatsüogo.

Ao Oshi tesayurtem angazükshiyim sentong agiogo



EBRC Mokokchung Village nung Ao Oshi Tesayurtem Angazükshiyim Sentong nung adener tesayurtem aser onük jembirtem külemi tangokba noksa.

Mokokchung, Rongchii/April 24 (TYO): Ao Oshi Tesayurtem Angazükshiyim Sentong ka Rongchii (April) 23 aser 24 nü EBRC Mokokchung Village nung Mokokchung district kübok aliba college aser school-tem nungi Ao oshi tesayurtem parnok 40 adenshia kanga dang takok ngua agiogo.

Iba sentong ya 2-Day Orientation Programme on the introduction of "A

comprehensive course in Ao" for class-IX, ta asüba nung ajemdaker Directorate of School Education aser Ao Riju semtepa ayongzük agiba liasü.

Anogo ananü sentong nung "Orülem aser Olem Rajem" ta asüba onük Wb. Meyimangyang, CMHSS Impur-i jembi. "Otsüolem aser Tensenyim" ta asüba onük Wb. I. Temjen Tzüdir-i jembi aser "Sangroren"

onük nung Dr. Chubatola Aier, Principal, C-Edge College Dimapur-i jembia liasü.

Onük jembiba ajak nung telok tesentepertem nungi jangjashinübatem rajema lemsatepba mapang agia liasü aser kasa sentong nungsa District Education Officer Wt. Sentinenla aser Ao Riju Chairman Prof. Rev. Rongsen Lkr tenatia tajungshi o aser tepela o jembia shilem agia liasü.

Dept. of English, DGC-i shiruru temeden indang sentong ayongzük

Dimapur, Rongchii/April 24 (TYO): Dimapur Government College nung department of English ajanga April 24, 2026 nü Society for the Prevention of Cruelty to Animals (SPCA), PM SHRI Government High School, Burma Camp & Burma Camp Bazaar Area, Dimapur nung "This is Their Home Too: Educate & Advocate for Animal Rights" omen nung ajemdaker extension activity ayongzük liasü.

Iba inyaksangshi ya HoD-i anir department nung tesayurtem aser 2nd, 4th aser 8th semesters nungi English agiba kaketshirtemi inyaka liasü.

Mezüng session nung Shuiching Konyak, Asst. Prof., dept. English menden liasü aser Marianne Rao, Executive Secretary, SPCA Dimapur ajanga pela agizükba o jembidang shiruru ajungtsü asoshi lungjemer inyaksü nungdakba indang ashi. Ai Dimapur nung SPCA tenzükba indang rateta shia liasü.

Iba sülen kaketshir tem nungi Hojila S (8th Sem, English Dept.) aser Mhao

Yanthan (4th Sem, English Dept.) nati shiruru temeden asoshi shisatsü lemsatepba aser advocacy nung lanur temi shilem agitsü indang jembia liasü.

SPCA, Dimapur Cell Vice President, Joseph Lemtur-i region nung SPCA centers kanga ajema aliba tebilemstü lemsatep aser iba amala facilities tekeraba nung ulushitsü nungdakba indang ashi.

Pai kaketshirtem dang SPCA ama lokti tentet den teka amteper inyaksü aser awareness mapa anir inyaka aotsü ajungmesoa liasü.

Paisa shiruru wazüka ayutsü atema ozüng balala yanglua aliba indang jembidang, district shia SPCA center alitsü nungdakba indang ashi. Tang Nagaland nung SPCA Dimapur ya kisüng lir.

SPCA, Dimapur Cell züngsem aser odongtar Eunice Lotha-i National Education Policy (NEP) 2020 indang mangdang lemsatepdang, meimchir asoshi ajaklen terenlok alitsü atema temeim sayutsü ya nungdaker, ta ashi.

Lai lanurtem dang SPCA nung züngsem akumtsü ayongzük, koba voluntary service ka lir.

Iba session tembangba sülen kaketshir temi hands-on outreach mapa nung shilem agi, koba SPCA tesem müreka tenzük.

Parnoki Veterinary Hospital, Dimapur semdanga yangji shiruru anepaluba yimya angazüka liasü.

Maneni parnoki PM SHRI Government High School, Burma Camp, Dimapur sendang aser Burma Camp Bazaar nung pamphlets lema agüja jaja liasü.

Uniqlo India nungi ketdangsürtemi Nagaland University semdang

Dimapur, Rongchii/April 24 (TYO): Uniqlo India nungi Kenji Inoue, Chief Operating Officer and Chief Financial Officer; Kanta Nagasaki, Store HR Manager aser Kamlika Deka, General Manager (Human Resources) nungertem densema teshimtet nisungtemi April 24, 2026 nü Nagaland University semdanga liasü.

Iba mapang parnoki University nung tesayur aser ketdangsürtem den sensaksema liasü.

Prof. Lungsang Zeliang, Convenor, Placement Cell ajanga parnok pela agizük aser Nagaland University aser Uniqlo tsüngta tesendaktep aliba indang pelaba ashi.

Sensaksema nung Placement Cell, Management, Commerce, aser Linguistics (COEFL) nungi Heads of the Departments aser Deputy Registrar Metsizolie Medoze nungter temi shilem agia liasü.

Iba sülen seminar ka agiba nung BBA programmes agirtem densema management aser commerce nungi post-graduate students, Japanese studies aser danga department tem nungi kaketshirtem dena liasü.

Iba sentong ya ajanga tarutsü nung University aser Uniqlo India tsüngta tesendaktep tajungba lia academic aser professional tsütsü tajangzük alitsü teimla sayur.

ULLAS kübok Capacity Building sentong ka Kohima nung agi

Dimapur, Rongchii/April 24 (TYO): ULLAS - Nav Bharat Saaksharta Karyakram kübok anogo ana Capacity Building Programme ka April 21-22, 2026 anogotem SCERT Conference Hall, Kohima, Nagaland nung agia liasü.

Iba sentong ya ULLAS kübok adult literacy inyakyim tashi itshitsü nükjidong nung Directorate of School Education, Nagaland ajanga "Empowering Educators, Transforming Lives: Advancing Adult Literacy through ULLAS"

Mezüng session nung Deenabandhu Panda, Additional Director menden liasü pai takum tepiyong angazükba aser universal literacy takok angutsü atema tesayur temi tongti shilem agiba indang lemsatep.

Iba sentong nung Mokochung, Kohima, Longleng aser Wokha districts tem nungi District Education Officers (DEOs) tem shilem agia liasü. Shilem agir ajak agi 56 liasü aser yangji Trainers of Supervisors tem densema liasü.

Iba sentong nung shisalen sayur ya Department of School Education & Literacy, Ministry of Education nungi Vidyawati, Under Secretary; Ashwani

Mezüng session nung Kumar, Joint Director, NIC and Suneeta Singh Chauhan, Senior Consultant aser CNCL, NCERT nungi consultants tem aser SCERT aser SLMA nungi ketdangsürtem aden.

Anogo ana nung ULLAS indang tongtipang components, Survey aser enrolment processes, Assessment and Certification mechanisms aser ULLAS mobile App/website amshiba indang angazükdaksü.

Iba sentong nung Foundational Literacy and Numeracy (FLN), digital challenges aser ULLAS Primer den teaching-learning materials tajungba nung amshiba indang awajema liasü.



पूर्वोत्तर आयुर्वेद और लोक चिकित्सा अनुसंधान संस्थान
(आयुष मंत्रालय, भारत सरकार के अधीन एक स्वायत्त संस्थान)

NORTH EASTERN INSTITUTE OF AYURVEDA & FOLK MEDICINE RESEARCH
(An Autonomous Institute under the Ministry of Ayush, Government of India)

File No.: Admin-16011/1/2025-NEIAFMR-ADMIN Date: 06.04.2026

RECRUITMENT
(Advertisement No. 02/2026)

Ministry of Ayush, Government of India kübok Autonomous Institute ka, North Eastern Institute of Ayurveda & Folk Medicine Research (NEIAFMR), Pasighat, Arunachal Pradesh-i Direct Recruitment/Deputation (Short-Term Contract densema) basis nung Teaching aser Non-Teaching posts atema temsüa aliba India sensotem aser Central Government/State Government/Autonomous Organizations nung inyakerem dang applications meshir.

S. No.	Name of Post	No. of Posts
1	Professor (Ayurveda)	1 (One) UR
2	Associate Professor (Ayurveda) [Agada Tantra; Dravyaguna; Kaumarabhritya; Kriya Sharira; Samhita & Siddhanta; Roganidan; Swasthavritta & Yoga]	7 (Seven)
3	Associate Professor (Ayurveda) [Kayachikitsa-UR; Panchakarma-UR; Prasuti Tantra Stri Roga-UR; Rachna Sharir-OBC; Rasa Shastra-UR; Shalakyia-UR; Shalya-SC]	7 (Seven) [Gen-5; OBC-1; SC-1]
4	Assistant Professor (Ayurveda) Kayachikitsa-EWS; Roganidan-SC	2 (Two) [I-SC; I-EWS]
5	Pathologist	1 (One) UR
6	Pediatrician	1 (One) UR
7	Obstetrician & Gynecologist	1 (One) UR
8	Anesthesiologist	1 (One) UR
9	Ophthalmologist	1 (One) UR
10	Radiologist	1 (One) UR
11	Pharmacognosist	1 (One) UR
12	Ethnobotanist	1 (One) UR
13	Herbarium Curator/Museum Curator	1 (One) UR
14	Resident Medical Officer	3 (Three) UR
15	Senior Assistant	2 (Two) UR
16	Panchakarma Assistant (Male)	2 (Two) UR
17	Panchakarma Assistant (Female)	2 (Two) UR

Koma Apply asütsü: Application ji prescribed format nung asütsü (iba website nung angutsü: www.neiafmr.org.in) iba denji külemi nungdakba documents 'self-attested copies' aser Demand Draft ji tim channel ajanga **Director, North Eastern Institute of Ayurveda and Folk Medicine Research, Pasighat - 791102, Arunachal Pradesh** dangi yoktsüla; aser ibaji **Employment News** nung iba advertise agütsüba sülen nungi **anogo 45** tsüngda agtsütsüla.

Temetetsü: Temsüa aliba arlratem, qualifications, experience aser application format ji Institute indang website www.neiafmr.org.in nung angutsü.

-Sd-
Director,
NEIAFMR, Pasighat

CBC 17218/12/0001/2627

Mon District Economics & statistics office ajanga IT osettem lema agütsü

Dimapur, Rongchii/April 24 (TYO): Birth Registration-Based Aadhaar Enrolment Initiative kübok District Economics & Statistics Office, Mon ajanga April 24, 2026 nü Deputy Commissioner, Mon indang Conference Hall nung IT osettsüset lema agüja liasü.

Yimdak yimtsüng nung digital registration system tashi itshitsü aser tongtipang statistics atema online ajanga mapa tekeraba aser tajungba inyaksü asoshi IT oset ya lema agütsür, ta Additional Director, Economics & Statistics, Nagaland, Charles Kikon-i ashi.

Mon district nem IT sets 33 lezmüksü, anungji ketdangsür aser staff temi itemji tajungtiba nung amshitsü ajungshir, ta pai ashi.

ADC Mon, Pakon Phom-i iba sentong nung jembidang, Birth and Death Certificate ya tongtipang Legal Documents lir aser iba kulizüng kaket angutsü asenok dak temeden lir ta ashi.

Mon district nung Aadhaar registration

ya kanga ajema lir, anungji ketdangsür temi nüburtem dang Aadhaar indang shisatsü agütsütsü nungdaker, kechiaser sorkar indang schemes aser senotsü teyari angutsü atema iba ya tongtipang document lir, ta pai ashi.

Pakon-i ketdangsürtem dang record shidak bendentsü ayongzük aser nüburtem dang sorkari agütsüba facilities ya timi amshitsü ayongzükba liasü.

Iba sülen Pakon-i arishi küm 0-5 tsüngta tanurtem asoshi Aadhaar Registration tenzükja liasü.

Sentong nung SDO Civil, Nchumthung Ezung-ia IT oset lema agütsüba ya asen Civil Registration system tashi itshitsü asoshi tongtipang mera ka lir ta ashi.

IT oset tasen amshiba ajanga record ayuba tajungba kumdaksüba kisüng masü saka service tekeraba aser tajungba nung agütsür, ta pai ashi.

Wangmoi Konyak, IOS, incharge of Births & Deaths, DESO office, Mon ajanga district nung Digitization indang osang tongmelang agi lemsatepa liasü.

Iba mapang pai Mon nung registration units 154 lir aser item rongnungi yimtsüng 98 nung tasoba aser tasüba online registration kanga junga inyaktar, ta pai ashi.

Birth & Death online registration tenzükba sülen tanur 2605 asoba züluokogo, birth certificate tejen 2671 digitized süogo aser tasüba 51 register süogo ta pai matetdaksü.

Iba sentong nung Yhunchilo Khing, District Economics & Statistics Officer, Mon menden liasü.



Office of the
Ao Kaketshir Telongjem, Shillong
(Ao Students' Union, Shillong)
H.Q. Shillong, Meghalaya
Email: aktshillong18@gmail.com

METETDAKTSÜR

Aoer kaketshirtem Shillong-i arua kaket shisatsü bushiba nung teyari nungdaka lira, Ao Kaketshir Telongjem, Shillong (AKTS) Office-i yaritsü mulunga aser renema lir. Anungji school aser college/university balala nung admission akitsü aser talidak hostel/paying guest bushitepa yariteptsü asoshi kaketshirtemi agüja aliba number nung tongtepreteptsü sangdonger.

President : Arentuden M. Longkumer (9366247063)
Vice President : Imkongnukba Imsong (8119823251)
General Secretary : Imnasena Longkumer (9863179017)
Asst. Gen. Secretary : Sharry Jamir (9866789823)

Sd/-
Arentuden M. Lkr
President, AKTS

Sd/-
Imnasena Lkr
G/Secretary, AKTS



April 24, 2026 nü North 24 Parganas district nung election nüboyim sentong ka nung Ato kilonser Narendra Modi aser BJP candidate tem tangokba noksa nung angur. West Bengal nung assembly election shilem tanabuba April 29 nü agitsü.

Ato kilonser Modi-i July ita nung Australia semdangtsü

New Delhi, Rongchii/April 24 (Agencies): Taküm July ita nung Ato kilonser Narendra Modi-i Australia semdangtsü; pai Indonesia aser New Zealand nata semdangtsü, ta Hokolbarnü osang ka ajanga metetdaksü. Modi-i Indonesia mezüing semdangba sülen July 8-9 anogotem nung New Zealand semdangtsü aser July 9-10 anogotem nung Australia semdangtsü. Australia aser India na tsüingda shisaliok densema sector aika nung teendaktep tajungba akümba mapang nung

pai iba linük semdangtsü. "Pai Australia nung Sydney aser Melbourne naprong semdangtsü. Australia Ato kilonser Anthony Albanese-i pa agizüksü. Pai semdangba ajanga Canberra aser New Delhi na tsüingda tesendaktep ano tajungba akümtsü," ta kasa osang ajanga metetdaksü. "Ajisüaka tongti sentongjibo Melbourne nung agitsü; kong pai yangji aliba India nungertem ajurutsü. Australia aser India ketdangsertemi iba sentong agitsü atema Melbourne nung aliba tesem ana

reprangdangogo; tesem ka nung nisung 14,000 aser ka nung nisung 35,000 dak tali asemstsü," ta kasa osang ajanga metetdaksü. 2023 küm May ita nunga Modi-i Sydney semdanga liasü. Quad summit nung adentsü atema Australia Ato kilonser Anthony Albanese-i pa jaoka liasü. Iba mapang nungji Modi-i Albanese den senden amenba den külemi Australia nung CEO aser business lenirtem den senden amen aser Sydney nung India nungertem ajurua liasü.

Iran nung Indian Embassy-i India nungertem yaridar: MEA

New Delhi, Rongchii/April 24 (Agencies): Iran nung tang tashi tensa kanga mejungi lir aser Iran yimtiba, Tehran nung aliba Indian Embassy-i maneni anünga aliba India nungertem yaridar, ta Hokolbarnü Ministry of External Affairs (MEA)-i metetdaksü. Osangbenertem den jembidang MEA otongdar kati, tang tashi nung India nung

2,400 kümzüka India-i anir ogo, ta metetdaksü. MEA otongdar Randhir Jaiswal-i, "Iran aser iba region nung tensa mejungi lir. Tang ceasefire lir saka tang tashi Iran aser tanga linüktem nung tensa mejungi lir. Ajisüaka asen Ambassador-i Tehran nung aliba Embassy nungi maneni mapa inyaker. Yangji aliba asen Ambassador aser

ketdangsertem ajaki linük atema inyaker. Parnoki sensotem nem teyari agütsüdar. Parnok teyari ajanga tang tashi nung onoki India nung 2,400 kümzüka anir aruogo. Parnok nem tenüingsang agütsütsü tetemsü," ta metetdaksü. Tan hopta tetenzüklen US Tir Donald Trump-i pa kijai telemtetba agia Iran den ano hopta ka ceasefire atsülangogo.

AAP MP Raghav Chadha-i party toktsür BJP nung denogo

New Delhi, April 24 (Agencies): Hokolbarnü Rajya Sabha MP, Raghav Chadha-i Aam Aadmi Party (AAP) toktsür Bharatiya Janata Party (BJP) nung denogo. Hokolbarnü osangbenertem den jembidang Chadha-i, AAP-i party tentetba mapang aliba tangatetbatem aliba nungi pilaadokogo, ta metetdaksü. "Kü zü aser asentzü agi yangertetba Aam Aadmi Party

asert ni kü lanur mapang küm 15 tashi agütsüba party-i tangatetbatem nungi pilaogo. Tangbo iba party-i linük atema meinyaker saka pei nija tajangzük atema dang inyaker," ta pai metetdaksü. Mapang talangka nungi AAP den mangatetep adoka liasü, ta shia pai, "Tesüiba küm aika nisung aikati kü dang iba o ya shia liasü aser nia 'ni nisung tetemsü saka party tai nung

adener' ta angateta liasü. Anungji tanü ni Aam Aadmi Party toktsür nüburtem dangi aoer," ta metetdaksü. Chadha-isa, pa den Rajya Sabha MP troki party toktsür BJP nung denogo, ta metetdaksü. Chadha den tangar trokji Swati Maliwal, Harbhajan Singh, Rajinder Gupta, Vikram Sahni, Sandeep Pathak aser Ashok Mittal nungir lir.



April 24, 2026 nü Jammu nung Pakistan occupied Jammu & Kashmir Refugee Front nungi züingsemtemi longkak aitba noksa nung angur.

Felicitaton

The medical Superintendent, staff and faculties of the Hospital and School of Nursing, Impur Christian Hospital, Mokokchung extend our heartfelt congratulations to **DR. SASHIMEREN AIER**, Chairman, Board of Trustees, Impur Christian Hospital, on his well-deserved appointment as Chairman, Medical Board, Council of Baptist Churches in Northeast India (CBCNEI).

Dr. Sashimeren's exemplary leadership in the administration of Impur Christian Hospital has been very inspirational. This prestigious role with the CBCNEI underscores his unwavering commitment to compassionate, faith-based medical services and community health. We wish him continued success, divine guidance, and greater impact in shaping healthcare standards across Northeast India.



MULUNGEN O



July 15, 1937 - April 20, 2026

Onoki teti meima aliba asür **Alikala Tzüdir**, wife of Medangchiba (Molungyimsen). Shirangdang aser iba alima toktsür aodang, ana aser talang nungi medemer, yimer-yimsanger, Arago aser lokti palala temi, nübu, rongsen aser Sarasadem agi nungita yariba atema kanga pelar. Tsüngremi nenok ajak maneni moajangma. ~ Temeim kinungbu, chirnurtem aser semchirtem.

Office of the Baptist Higher Secondary School Mangkolemba P.O. Mangkolemba - 798604, Nagaland

NBSE ajangaa giba HSLC aser HSSLC (2025-2026 Batch) tatidang nung 100% pass asüba den takok khonang nungsang tulu bener arutsüba asoshi kaketshir aser tesayur ajak nem BHSS ketdangsertemi tenüingsang aser tetushi tulu agütsür. Tsüngremi nenok ajak tarutsü anogo temnung tali moajangma!

HSLC TOPPER



Benjongsena
Top 19 & Subject Topper in Tourism & Hospitality

Admission Forms Available for Class 11 (Arts) Hostel Facility Available For any queries: 8415840971



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGCHII 25, 2026

Senso mashishii kümdaktsüba !

Dimapur nung Marwari nunger kanga takar ka tenüng agi Nirmal Jain nem 2002 küm March 14 nü Dimapur Deputy Commisioner office ajanga Nagaland government-i Nagaland senso asütsüsa temeten agütsüba kuli kaket, Indigenous Inhabitant Certificate, magütsütsüba ser nung agütsüba puteta, tang küm küm 24 buba nung katitsüba osangji Nagaland nung alir Naga nunger ajak asoshi kanga taoksatsü aser tekümdangtsü osang ka asütsü. Atangji, Nagaland nung arua lia business junga inyakertem aika Nirmal Jain amaji sensobo masü ser nung senso temeten kaket meshia yur, Dimapur nung ali kimong alia Naga nunger dak mesepa alitsüa akok. Ajisüaka, Nagaland government nung senso kuli kaket agütsütsü tashi amer ketdangsertemi anir asenok nübertem shingaiia Nagaland nung senso masüba bendanger nem senso temeten agütsüba maparen ya süoki ia mebilemer. Ibayongji, Nirmal Jain nem Nagaland senso agütsüba anema yaküm 2025 küm June ita nung Dimapur Naga Students' Union (DNSU) purtemi government nem takangba agütsüba ken o nung Naga nunger lokti tentet-ia mesüra kija asüyonga shingaiia DNSU pu sema ola adokba mangashi. Ibaji Nagaland nung alir Naga nungertemi Nagaland senso jenjang memetetba agi asü mesüra Nirmal Jain meimba agiar ashitsü makok, ajisüaka bendanger nem senso temeten agütsüba ken o ama yabo sensosanger ajaki süoki ia agitsüla aser government office nung senso temeten kuli kaket agütsürtemia kanga kümdanga aser indanga inyaktsüla. Aji oda, asenoki mangateter dang ashi, bendanger ka nem asen senso temeten agütsübaji aser kidang asen kinungertema meperi aser magishi ali nung, ano tangar ka anioka asen den kasasa senmanger kümdaktsüba amai lir. Nagaland nung ya senso tapu ana lir, kaji Naga zü agi sosemba Naga nunger aser ano Nagaland senso kaji, Naga zü agi sosema meliaka, tsümar asütsüa akok mesüra Naga nungersa asüyonga Nagaland state nung aliba Naga nunger mesüra, parnok ajakji Nagaland state kümer mezüng Electoral adokba kaket nung pei tenüng mesüra pei tsürabur tenüng alitsüla. Ibayongji, Dimapur nung, talisa, Marwari aser Bengali nunger aika Nagaland senso kümer pei ali kimong nung mesemteteta lia arurtem aika lir. Atangji, Nirmal Jain amaji, tesülen business inyaktsü aruba ser nung Nagaland senso kümnübaji Nagaland nung ali kimong alia kibur küma linüba agi lir, kechiyong Nagaland senso masüba nisung kati Nagaland nung ali-kimong alitsü makoker aser Nagaland nung senso akümtsübaji pei tenüng aser mesüra pei tsürabur tenüng Nagaland mezüng Electoral nung alitsüla. Ibaji paidoker Nagaland senso kümtetbaji, atangji, Nirmal Jain dang masü saka Nirmal Jain nem 'Indigenous Inhabitant Certificate' agütsüsang tularjia shitak masü. Ibaji meteta aser memeteti pei temeten bendanger nem agütsüba mapa ka lir. Tang Dimapur nung, talisa, tsümar business inyaker takarterem ya aika küm 40 jakdang aruba purtem lir aser parnoki alo beyaz aser jang nungi tenzüker asenok nungdak ajak ayoker. Aji oda, item jagi election nunga Naga nunger candidate aika senotsü agi yarir, anungji adoker külenang parnokiang yimsü asür amai tashi amshir. Asenok asoshi kanga takoksa kaji, tawa tashi to Nagaland nung ILP mamshi, anungji Nagaland senso mesüaka India nunger dang süra Dimapur nung arua alitsübaji kecha balaka tenokdangba ozüng mali asü. Atangji, tawa nungibo Dimapur nung ILP amshi tenzükögo, saka tang tashia junga maka küma meinyaktet kangshiba angur. Ashi, mezüngyongi, Dimapur nung dena ILP amshi tenzükö asübo, Nirmal Jain ama senso masüba nisung senso temeten mengula. Joko, tang nungi danga, government inyakim nung Nagaland senso masüba purtem nem senso kuli kaket dang masü saka ILP agütsüdanga kanga kümdangtsüla aser kanga junga jangjashiteptsüla. Atangji, Nagaland senso masü ser nung Nagaland senso agütsüba aser Naga nunger masü ser nung Naga nunger kümdaktsüba purtem aika takar tular lir aser parnok dangjiang senso purtem meshimetsüa alir. Aji kecha tesüngmangtsü mali, tsürabur mapang nungi tebu yimdaktsü dang kanga ashishia yimdaktsü aser alima yimya nunga, yimkümertem dang nungibo tesü arurtem takarba tularba küma jangratatamba alir. Asenok sensosanger bendanger kübok alibaji parnok tai masü asenok tai ta tang Nirmal Jain dak atalokba maparen yagi angatetdi.

OLEMSABANG

Theology zünger Tsüngrem tenzüksü nangzükba

L. Kika Pongener

1960s -70s tashi nung Aor arogotem nung Pastor-tem aser Tesayula-tem Theology mazüngertemi sayua aru. Iba mapang tashi nungpo arogo nung toklang tenzüker....Associate Pastor, Directors, Evangelists....ta tanü amai mali asü. Arogo ajak nung itasen tila agi ariana Pastor, tesayula, Secretary, Chowkidar ta dang yua liasü. Meilungi Pastor aser tesayula teimba ka Impur nung Vernacular Bible azüngertemi sayua aru. Iba sulen arogo kar nung B.Th. azüngertemi sayua aru. Tanübo Aor arogo ajak nung toklang tenzüker teimba ka BD aser M.Div. azünger yua lir. Ano arogo tulu kar nungbo M.Th aser Doctorate azünger tashi yua lir. 1960s -70s tashi nung mungdang nung tenzükertem aser arogo nung Pastor & Tesayula-ji 'Kodak Tenyar' amai kanga nukshia reprang. Iba mapang tashi nung Reverend-bo bulua mali asü. Meilungi Pastor-tem kar Ordain asüba ngua aru; aser item Reverend-temjibo ano Tsüngrem amai kanga akümtsüba reprang. Jokorla, tanübo mungdang aser arogo nung tenzüker Reverend aika kümogo. 1960s -70s nung mungdang nung tenzüker aser lim arogotem nung Pastor aser Tesayula-ji tanü amai tazüngba Degree tulu azünger mesuaka; tongmelang tamang ser; tajaba tejangja angatetba; bendanga agütsüba, pei asoshi mebilemi; mungdang aser arogo mapaji ajak dang tongtipangba (Priority) sudaktsür, kanga meranga tenzükbua ngua aruogo. 1960s-70s mapang mungdang aser arogo nung tenzükertemji; itasen tila agi kibong tepok masüng kangasa timtema tenzüka aruba nguogo. Ajiser, itasen tila-jia mapang shitak nung kodanga mangu....Saka item timtem ajakji aremzüka ola madoki bendanga agüja tenzükbua ngua aruogo.

Tanü-bo Aor arogo nung toklang tenzükertem; arogo tila kar dak alaka, teimba ka nung itasen tulu agütsür, ki tajung nung lidaktsür aser itasen dak alaka nungdakba teyari peria agütsür. Akhi mapang mungdang aser arogo nung toklang tenzükertem den tanü putu nung tenzükertem medemdangra; anung o ali na amai lir. Temalen shisemba ama....Akhi mapang tenzükertemji itasenbo tila; saka mapa wadango tulu; kechiyung parnok mapang tanü amai Associate Pastors, Directors, Evangelists....item ya mali asüji; Pastor aser Tesayula jagi Pulpit nunga sayutsüngitsü, kipoksema aotsü, ketdangsuba mapa-a inyaktsü; oda arogo rangben khuji tenati benloker inyakba ngua aruogo. Tanübo arogo nung mapa ajak Ministry, Committee, Board....ta lemsar inyakerji pongpa-pongpar. Ano tanübo mungdang nung tenzükertema lim arogotemi tershilem nungi percentage agütsüba agi kangapo timtem meli-i tenzükdagi ta bilemer. Anungji mungdang aser arogo nung toklang tenzüker ajaki temulung masüba, tenuk masüngba, nungsen-pangsen kecha meli-i; kanga pelaseta, Tsüngrem tenung kanga sanga, ajemalua tila kümer, bendanga agüja tenzüksüla. Akokba tashi toklang tenzüker ajaki pei mapa nung tamakok maludaktsüi, azümesen mesui, nendak-nendaka, Tsüngrem mulung achitsüsa tenzüksüla. Tanü India lima tesem balala nung Tsüngrem tenzüker-tembo reshikangshi, amokmeren aser karbo taküma dena tepsetba; Pastor-tem, Missionary-tem aser Evangelist-tem aika atsükshia, jenshia, tsübuseta, timtema tenzükbua otsü/osang angur aser angazüker. Parnok denji asen lima nung tenzükertem medemdangra....Asen lima nungpo tang tashibo iba ama timtem kecha mali, ayung-ayunga dang tenzüker....Anungji kanga pelaseta, Tsüngrem tenung kanga sanga, bendanga agütsür tenzüksüla.

Tesasatsüka, tanü asen lima nung, arogo nung toklang tenzüker aika Degree-bo tulu-lu zünger; saka bendanga magütsüba aser pei tajaba aser shimtetba mangateti tenzüker aika lir. Aji oda, shirnok Tsüngrem tenzüksü mulungteter Theology azünger; pa/la dak bendanga agütsüba aser tesayutsü sempet alitsüla; sempet melira Degree tulu azüngba kisung agi dangpo metenzükettetsü. Tsüngrem tenzüker asüyunga alima nung dang tenzüksü asünung....Tenzüka aodang; nungsen, timtem ibala mesukba tensa tia aiben ajurutsü. Tsüngrem tenzükbaji teti teka mahdena, ken tena; laishiba zünga; pelatepa dangpo metenzüktsü. Aji oda, alima nung dang tenzüker asünung; tenzükbua mapang tensa tia balala ajurua aodang...Pei tajaba aser shimtetba mangateti tenzükra; tezü atangtsü; metenzüknuai akümtsü; tejangraba samatsü; aser karbo 'SEN' nung aibelentsü. Lanur karbo mozü-lar/yi-lar asüba Theology züngra melenshitsü sudi....ta sur kangshia Theology azüngi yokba lir; karbo tanüribo mejangrar sernung tsüraburi kangshia yokba lir. Ano karbo Youth Camp aser Revival nung medemer Theology azüngtsü nangzükba ngur; jilu benshia nangzükba-a lir.

(Maneni asüng adok nung...)

METONGSHITSÜR

April 24, 2026 adok nung Tapak 4 Olemsabang ocet "AO (NAGA) LIMA NUNG KHRISTAR AROGO TETENZUK OTSU-REN NUNGI ADOKBA KHURET: ASENOKI (ABAM) ANO MANENI REPRANGSHITSU NUNGDAKER" ta asüba nung tezülur Walu T Imchen ta alibaji Rev. Temsu Imchen ta melenshia agitsü metetdaksür. Aibelena email yoker tenüng adoktsüba atema sasar.

-Tir Yimyim staff

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yisu kürakyanglu raksatsür Israel sepai ana jail nung puoktsü



Lebanon nung Israel nung sepai kati Yisu Khrista kürakyanglu tepsatsüba mapang tangokba noksa nung angur.

April 24, 2026: Tawa Lebanon nung aliba Khristan yimtsüng ka nung Yisu Khrista kürakyanglu ka raksatsüba atema Israel nung sepai ana jail nung puoktsü aser rara nungi anitettsü, ta Israel Defence Forces (IDF)-i metetdaksü.

Israel-i Lebanon nung Hezbollah telok anema raradang yimsü dak sendakba tesemtem aser Khristantem amakba tatalokba aika lir.

Martol amshia Yisu Khrista kürakyanglu raksatsüba noksa ka April 19 nü Palestine nung journalist Younis Tirawi-i proka liasü.

Israel den arrtsülen Lebanon kübok Khristan yim, Debel nung Yisu kürakyanglu laer alidak Israel nung sepai kati martol agi kürakyanglu raksatsür.

Debel nung aliba Arogo nung tongti putir, Fadi Flaifel-i, "Onok atema temeshi temaitsü Kangki aser yimsü dak sendakba temaitsü balala raksatsübaji onoki sashia aitsür. Iba ya meimchir temeden anema lir aser meimchir dak aketba yimya masü," ta metetdaksü.

Assembly of Catholic Ordinaries of Holy Land-ia sangdong ka ajanga, Israel sepaitemi Khristan temaitsütem raksatsübaji aitsüba den külemi tarutsü nungbo yamaji mebenshitsü metetdaksü.

2024 küm January ita nungi 2025 küm September ita tashi nung Israel nung Khristantem anema inyakba tatalokba 201 liasü, ta Religious Freedom Data Centre-i metetdaksü.

Israel nung Khristantem anema inyakba tatalokbatemji teimbaka Orthodox Yihuda nungertem ajanga lir, ta

parnokisa metetdaksü.

Taküm küm tenzüker mezüngbuba ita asem tashi nung (January-March) Israel nung Khristantem anema inyakba tatalokba 44 liasü.

Anogo ishika tejaklen Israel sepai anati Yisu kürakyanglu raksatsüba tatalokbaji shidak, ta Israel Defence Force (IDF)-ia nangzükogo.

IDF-i, sepai kati kürakyanglu raksatsü aser sepai kati ibaji video tangoka liasü, aser ibaji sepaitem tetuyuba anema inyakba lir, ta metetdaksü.

IDF-isa, sepai anaji rara nungi anitetogo aser ita ka tepuokdak ayutsü, ta metetdaksü.

Iba dak alia Israel nung sepai trokia iba tatalokbaji repranga liasü, ajisüaka parnokisa kati ibaji video tangoka liasü, aser ibaji sepaitem tetuyuba anema inyakba lir, ta metetdaksü.

IDF Chief of Staff, Lt. Gen. Eyal Zamir-i, iba tatalokba ya tim mesüi inyakba lir, ta metetdaksü.

Israel sepaitemisa Debel nung alirtem den angatettepa Kangki ka amenoktsüogo.

Ano külen Israel Ato kilonser, Benjamin Netanyahu-ia, "Iba tatalokba ajanga ni kanga aoksar aser jashir," ta metetdaksü.

Israel Foreign Minister Gideon Sa'ar-i, iba ya maaksütsü mapa ka lir, ta shia Khristantem temelung yirutsüba atema Khristantem dang tatok meshi.

US Ambassador Mike Huckabee-ibo, iba ya kanga tejashitsü mapa ka lir, anungji tekeraba nung temerenshi agütsüsüla, ta metetdaksü.

Israel-i Lebanon nung

Hezbollah telok anema raraba ajanga nisung million 1 dak tali jenshiogo, tanur 177 aser health workers 100 densema nisung 2,290 tepsetogo.

US-i ketdangsüa inyaksangshiba ajanga Israel aser Lebanon na tsüngda ceasefire tezüngzüktep agiogo, ajisüaka linük anapronglai ceasefire temzüng alema inyaker.

Maharashtra Angh-i anti-conversion Bill nung sign asütsü memelung

April 24, 2026: Maharashtra Angh, Jishnu Dev Varma-i Maharashtra Freedom of Religion Bill 2026 nung sign asütsü memelungba sülen iba Bill ji linük Tir, Draupadi Murmu dangi yokogo.

Ketdangsertemi ashiba agi, iba Bill nungji Bharatiya Nyaya Sanhita (BNS) aser Bharatiya Nagarik Suraksha Sanhita (BNSS) nung alibatem sendaktepa lir; anapronglaji linük temzüng nung Seventh Schedule kübok Concurrent List nung lir, ibayongji state Angh-i iba bill nung sign asütsü memelung.

Concurrent List ya Centre aser states naprongla kübok lir, anungji iba bill ji Arrla 246 kübok linük Tir matsüngdang benoktsü nüngdaker.

"Iba bill nung BNS ama concurrent list nung aliba densema lir, ibayongji iba Bill Tir dangi yokogo. Tiri sign asü nung ang iba bill ji ozüng akümtsü," ta ketdangser kati metetdaksü.

Maharashtra Freedom of Religion Act, 2026 ajanga mesüzüka mesüra tashiyim amshia mesüra tim masüba lenmang ajanga yimsü meyipdaksüba nokdang.

Ano yimsü melentsü tebilemba alirtemi anogo 60 jelia

ANOGO ABEN TSÜNGREM DEN

Tsüngremi mulungba

Nenoki ya ashitsü tim, "Kibubai mulungra asenoki taküm ibai mesüra ibaji inyaktsü". Yakob 4: 15.

Tanü telok balalai shisatokten sentong yanglua alir, aser iba nung o jembiri jembiba kaji "alizüng ayutsüla (goal setting)". Iba tetezü, nai kechi süner mesura kumner ibaji akümtsü atema ne nükjidong tejangja aser talang nung ayutsüla. Iba tajungshiba o ajaki junga agizükdang, Khristan ka ama tenangzükba nung Tsüngrem metendaksüba sentong meyanglutsüla.

Yakobi Khristania Tsüngremi mulungba meteni sentong yanglur ta tekumdangtsü agutsu. Asenok shirnok Pa temeim kubok alir Pa peladaksütsüla ta bilemtetdaksür. Kodang asenoki tarutsü sentong yanglur asenoki Pa nungi tetuyuba aser leniba asüngdangtsüla. Kodang asenoki "Kibubai mulungra" ta benokdir aseni junga inyaker. Iba o jagi asen sentong melenshitsü mesüra anentsü mulunga aliba sayur, aser Tsüngremi inyaktsü mulungba lir ta angatetdaksür. Takümi tamakok aser tashishitsü bena arur.

Kü sentong nung kechi tai? Kü mapa, shisaliok, mesüra satitsü atema Tsüngremi mulungbaji koba? Asenok sentong yanglur nükjidongji angatetra asenok asoshi Pa lenmangji asenoki agizüktettsü. Asen pungmang aser taginuba ajak nung, "Kibubai mulungra" ta enoktsü akok. Onok alangzüktsü asoshi Tsüngrem shibai Pei ajaso Chir agütsü Pai asenok tamakok maludaksütsü.

District Magistrate nem osang metetdaksütsüla. Iba notice ji anogo 30 tashi yimjak nung sayatsü aser iba mapang nungji tashishiba kar danga lira agizüktsü.

Nisung ka yimsü melenba sülen pa/lai anogo 21 tsüngda ketdangsertem nem 'formal declaration' ka agütsütsüla.

Iba bill ya agizüka ozüng kümra aibelenertem küm tenet tashi tepuokdak ayutsü aser senchi sen lakh 1 tashi achitsü. Ano yimsü melenerji tanur süra, tetsür süra, mabensa süra mesüra Scheduled Castes/ Scheduled Tribes nisung ka süra senchi lakh 5 tashi achitsü.

Ano aiben aibelenertembo küm 10 tashi tepuokdak ayutsü akok aser senchi lakh 7 tashi achitsü akok.

Taküm March 13 nü Chief Minister Devendra Fadnavis-i iba bill ya Legislative Assembly nung benoka liasü aser March 16 aonung assembly nung voice vote ajanga agizüka liasü.

Tasüngnü Legislative Council-i iba bill ji agizük.

Maharashtra nung Khristan nütsüngji shilem kata majung. Iba bill agizükba sülen state nung Khristantemi iba bill anema ola adoka liasü.

Pastor kati, "Linük nung anti

conversion ozüng tesashibaji Maharashtra nung benokba atema jashir. State nung Khristan nütsüng shilem kata majung, ajisüaka asen state aser nüburtem ajungtsü atema Khristantemi mapa tulu inyaker," ta metetdaksü.

Pastor-isa, "Iba ozüng ya onoki lokti tenzükba mapatem inyakba ashishitsü aser Khristantem tsübudaksütsü atema lir. Tamajungtibaji- iba ozüng ya ajanga Khristantem anema inyaktsü atema nisung tamajungertem tasü itshidaksütsü," ta metetdaksü.

State nung organisations 30 dak tali longjemer iba bill anema ola adoka liasü. Iba ozüng ya nisung ka yimsü temeden anema lir, ta parnokisa metetdaksü.

Tang iba bill ya Rashtrapati Bhavan nung lir, aser Tiri agizükra ozüng akümtsü.

April 16-17 anogotem nung linük Tir, Murmu-i Maharashtra kübok Wardha nung aliba Sevagram Ashram semdanga liasü.

Lai state semdangba mapang nung Angh aser tongti ketdangsertem aika ajuruogo, ajisüaka lai anti conversion bill dak sendakba nung kecha mejembi.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Yakümba

(n) tesüiba küm anabuba (previous, year before last year)
* Yakümba ni kanga shiranga liasü.

Yakanü

(n) yashi ser taoba anogo, anogo ana sülen (day before yesterday)
* Yakanü nungi kaketshirtem tatidang tenzükogo.

OLONG PAITEP # 7484

Grid for crossword puzzle #7484 with numbers 1-17 indicating starting positions.

TIPILEN

- 1. Aonung tiprong - (7)
7. Anogo tanabuba - (5)
8. Mapang aben - (5)
10. Ozüing alema inyakertem - (11)
13. Tarutsü alizüing - (5)
16. Mi nung atsük - (5)
17. Süngtsük - (7)

LANGTSÜNGLEN

- 2. Idakji - (6)
3. Tebur tsüingda jatepba - (4)
4. Teinyaksü - (4)
5. Medemer tajung - (6)
6. Tarutsü indang ashirtem - (6)
9. Jenjang aika alangba yin - (3)
10. Yisu metadak - (6)
11. Tashiyim agi bener ao - (6)
12. Okshia - (6)
14. T ____ hir - (4)
15. Teinte ____ o - (4)

OLONG PAITEP # 7483 TELANGZÜBA

TIPILEN :

- 1. Telok, 4. Aluru, 6. Ozüing, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. teronem, 12. Sempa, 13. Jahaz.

NAI-A YA METETTER MA



France nunger Jonas Livet-i alima nung zoo 1,515 tema semdangogo aser iba atema pai "most zoos visited in the world" indang Guinness World Record ngua lir. Jonas ya zoological consultant kalir aser pai mezüing zoo semdangbaji 1987 nung Tierpark Berlin, Germany semdangba liasü.

Abhi-Neel tepsetba ken o nung aitsür ajak tepuokdak ayutsü



Guwahati, April 24, 2026

(Agencies): Abhi-Neel tepsetba ken o nung Nagaon Sessions Court-i nisung 20 aitsüogo aser parnok ajak taküm piyong tepuokdak ayutsü temerenshi agütsüogo.

Nagaon Sessions Court-isa parnok nisung 20 shia dang Rs 20,000 senchi chiogo.

Sessions Judge Dibyajyoti Mahanta-i iba ken o tembanga

angadamba sülen oshidang agütsü.

Okadaki aitsürtem ya Biswa Ram Swargiary, Pantheng Basumatary, Alphajoz Timung, Inosen Engti, Raikom Timung, Ratneswar Terrang, Phukan Lekhte, Anos Timung, Pres Timung, Rupsing Kro, Dhono Mech, Babu Singh Kro, Bikram Hanse, Sikari Rongpi, Babu Rongpi, Bidyasing Rongpi,

Mensing Kro, Dipjyoti Basumatary, Wares Rongpi, aser Onda Mech nunger lir.

Ajisüaka Abhi aser Neel'er kingertemiba oshidang nung temulung masüba metetdaksüogo. Parnoki Gauhati High Court nung iba oshidang anema ken o benoktsü akok ta shiogo.

April 20, 2026 nü okadaki nisung 45 rongnungi 20 aitsü aser tanüingba nisung 25 metenja liasü.

Abhi aser Neel na ya 2018 küm Karbi Anglong nung nisung telok kati tepset.

Iba mapang tanur apuba olulu kar prokshia liasü aser nisungtemi tena ya tanur pur aoertem ta temulung melemi züka merenshidang tepset.

Tezpur University nung department tasentem tenzüktsü

Guwahati, April 24, 2026

(Agencies): Tezpur University-i multidisciplinary education, research collaborations, aser infrastructure nung temulung agüja 2026-27 session atema expansion aser academic development plan metetdaksüogo.

Pro-Vice Chancellor Prof. Amarendra Kumar Das-i tang In-Charge Vice-Chancellor ama inyaker aser pai ashiba agi Tezpur University ya academic hub ka akümtsü atema inyaker.

Tezpur University nung Economics, Psychology, Political Science, Geography, Performing Arts, aser Vocational Studies & Skill Development department tasentem amenoktsü atema University Grants Commission nungi temelaba atar ta Prof. Amarendra-i ashi.

Külen, Ministry of Education-i Department of Tribal Studies ka tentettsü mulunga agizükogo aser iba ya

yakta mapa akümtsü ta paisa ashi.

Assam sorkari Naduar constituency nung ali talila agütsütsü maparen inyakdar aser iba ya University ulushitsü atema lir. Udalguri district kübok Bhairabkunda nunga university centre tasen ka lapoktsü sentong lir aser Department of Bodo language tenzüktsü.

"Tezpur university-i maparen balala ajanga research ecosystem akangshidar. Onoki Silpakorn University, IIT Guwahati, Queen's University Belfast, aser University of Auckland amala rejutem den tesendaktep balala yangluogo" ta Research & Development Dean Prof. Soumik Roy-ia ashi.

Tezpur University-i Indian Institutes of Technology pungu den külemi Hyundai Centre of Excellence EV/Battery research network nung adentsü. University-isa Department of Science and Technology, Department of Biotechnology, Council of Scientific and

Industrial Research, Indian Council of Social Science Research, aser Indian Council of Medical Research nungi research funding nguogo ta Prof. Soumik-isa metetdaksü.

2026-27 session atema national-level entrance tests aser institutional examinations agitsü. Item nung Tezpur University Entrance Examination (TUEE), CUET-UG/PG, JEE Main, GATE, CEED, UCEED, NID DAT, NET, SLET, aser GAT-B dena lir ta Entrance Examinations Director Prof. Laxmikant S. Badwaik-ia metetdaksü.

"Tezpur University ajanga undergraduate, postgraduate, aser doctoral levels nung programmes 72 agütsür. Item nung BTech, BDes, BA, integrated master's programmes, aser MTech, MA, MSc, MCA, LLM, MTTM, MEd, & MDes amala postgraduate degrees dena lir" ta Academic Affairs Dean Prof. Ashim Jyoti Thakur-ia ashi.

Tripura kaketshir Anjel Chakma-i police dang mepelar

Agratala, April 24, 2026

(Agencies): Dehradun nung Tripura nunger arishi küm 24 tain Anjel Chakma tepsetba atema Uttarakhand Police-i mapa shitak meinyaker ta Anjel tebui aitsüogo.

Iba lendong ataloker ita pezü tema süia aruaka Anjel tepsertem ano pua marutet lir ta Tarun Prasad Chakma-i ashi. Tarun ya Border Security Force (BSF) nung head constable ka lir.

December 9, 2025 nü Anjel Chakma aser pa tenu na Selaqui area nung züka merenshi aser iba sülen December 26 nü Anjel asü.

"Ita aika süiogo saka police-i mapa meinyaker. Iba ken o nung tongti tai tonglokja alisangji Nepal nung lir ta bilemer saka pa indang osang tejangja mali" ta Tarun-i

osangbener dang ashi.

Mezüngbo police-i First Information Report (FIR) benoktsü memulung saka Member of Parliament kati tebang aiba sülen ang FIR benok. Iba ken o nung local kettangsurtem aser tai tonglokja alir na tesentaktep lir ama bilemer ta paisa ashi.

Iba tatalokba nung tongti süa temulung melemi bilemba nisungji Yagyaray Awasthi lir. Pa ya Nepal kübok Kanchanpur nungi lir aser iba tatalokba sülen pa jena ao. Police-i nisung trok nungi pungu pua lir.

January ita lookout circular (LOC) ka agütsü aser linük balala bushiteptsü atema Blue Corner notice ka agütsüogo ta kettangsurtemi ashi. Maneni, Red Corner notice ka agütsütsü atema mapa inyakdar ta parnokisa shisem.

Tarun Chakma ya Sipahijala, Tripura nung mapa lemsüka lir aser pai ashiba agi par jabaso Anjel ji kaketshir tajung ka liasü aser MBA placement nguteter liasü.

Anjel-i MBA placement ji Rs 12 lakh (annual package) atema ngua liasü aser December 27 nungi internship tenzüktsüba liasü ta tebu Tarun-isa ashi.

"Ni pa züingdaksütsü atema BSF nung küm 30 inyakogo. Pa tarutsü tajung liasü saka pai iba maongka mangu" ta tebuisa ashi.

Tarun-isa Uttarakhand nung par jabaso tanubosang atema tebilemtsü abenba lemsatetep. "Ozü jabaso ka süogo aser kaji kanga tsübuokogo" ta pai ashi.

Social Welfare Department ajanga par kibong nem Rs 8.25 lakh teyari agütsüogo.



CHRISTIAN HIGHER SECONDARY SCHOOL

NYAMO LOTHAR ROAD, DIMAPUR - 797112, NAGALAND

'In Love And Truth We Strive'

With great joy we congratulate all our successful students for your glorious achievement in the HSLC & HSSLC Examination 2026.

May God continue to bless you in all your future plans and endeavours.

Continue to soar !

Oh give thanks to the LORD, for He is good; for His steadfast love endures forever!

~ I Chronicles 16:34

TOPPERS 2026

HSLC



Sentilong Imchen
Top 11



Md Marzaqur Rahman
Top 13 (a)

HSSLC COMMERCE



Witamsinbo Kaurinta
Top 3 (a)



Farhad Uddin
Top 5 (a)



Yelobemo Kikon
Top 5 (b)



Rohit Kumar Chaudhary
Top 7



**ITES
TONGTINUNG LONGKUMER**

SUBJECT TOPPER

HIGHEST MARKS IN HSSLC EXAMINATION 2026

Name	Subject	Marks
Anurag Kumar	FBM	100
Immanuel Rai	B.Studies	97

- A Felicitation Programme for the toppers will be held on **4th May 2026 at 9:00AM** in the Covenant Hall
- All toppers are requested to attend the function along with their parents in regular school uniform

Sd/-

S. Moatemsu Walling
Principal

Ozüng nung züngsem mindoktsü shia mali: NATO

Brussels, Rongchii/April 24 ashir. (Agencies): Iran rara nung Spain tangatetba mechi US-i iba linük soittsü asoshi lenmang bushitsü akok ta osang ka temai adokba sülen NATO-i par military alliance nungi züngsem linük mindoktsü ozüng mali ta

US ketdangsür kati ashiba agi, internal Pentagon email ka nung US-i par tembar linüktem rongnung par inyakyim bhukuma menokdaker ta amangertem merenshitsu asoshi mera agitsüba sayur.

Iba email nungya ano south Atlantic nung aliba Falklands asetkong tem UK-i kibur kuma jembiba nunga US jenjang reprangshitsü ashir, koba Argentina-ia par meyong ta ashir. NATO ketdangsür kati, iba

telok tenzüka tezüngzüktep nung NATO züngsem soita ayutsü mesüra mindoktsü ozüng kecha mangur, ta BBC dang ashir. Spain leniria iba osang ya tiaziü lir ta ashir. February ita tatemlen US aser Israel nati Iran amakba

sülen aser iba sülen Iran-i Strait of Hormuz lenmang nung rong senzüba nokdangba nung NATO allies temi shilem tuluba agitsü nungnangba atema US Tir Donald Trump-i aiben tenüng sena liasü. (Maneni tapak 8 nung...)

Inter District Tournament 2026 takok marok Chümoukedima-i nguogo



Dimapur, Rongchii/April 24 (TYO): Hokulbarnü Senior Men's Inter District Tournament 2026 cricket asayamung final Nagaland Cricket Stadium, Chümoukedima nung asayaba mapang Chümoukedima-i wicket trok agi Dimapur madak takok ngua liasü.

Chümoukedima-i toss akokba sülen mezüing bowling asütsü shim aser bowler temi kanga junga asayaba sülen batting tsütsüa kanga süngjema asayateta liasü.

Dimapur mezüing batting alidang overs 25.1 nung runs 80 nguteta wicket 10 agidaktsü.

Dimapur nungi Shamphri Terang-i balls 34 nungi runs 26 nguteta par telok nungi pai runs

timtiba agia liasü, ajisüaka iba sülen tanüingba asayartemi imlaba ama masayatet.

Kasa mapang Chümoukedima nung bowlers temi iba asaya kanga junga amokbangtet. Neizekho Rupreo-i overs 7.1 nung runs 16 agütsü aser wicket pezü agia Player of the Match angu. Pa yarisema Imliwati-i runs 15 agütsür wicket asem agi aser Ravi Kumar Ram-i runs 36 agütsür wicket ana agia liasü.

Iba sülen Chümoukedima nungi asayar temi kanga ayong-ayonga target tongteta overs 17.1 nung wicket pezü out sür runs 85 nguteta takok angu.

Chümou nungi Jonathan Rongsen-i balls 21 nung runs

27 angu, aser Aloto Sumi-ia balls 19 nung runs 23 nguteta liasü.

Dimapur nungi Hopongkyu Sangtam-i runs 23 agütsür wicket ana agi aser Sundram Gupta-i wicket ana agi saka runs 12 agüja liasü.

Iba asayamung nung sempet balala vamai angu:

- * Champions: Chümoukedima
- * Runners-Up: Dimapur
- * Player of the Tournament: Imliwati Lemtur (Chümoukedima)
- * Best Batsman: Aloto Sumi (Chümoukedima)
- * Best Bowler: Imliwati Lemtur (Chümoukedima)
- * Best Wicketkeeper: Yugandhar Singh (Chümoukedima).

BENDANGLI OSANG :

Tapak 7 nungi...

Ozüng nung züingsem mindoktsü...

Iran amaktsü atema Spain-i par litsü nung aliba air bases tem amshitsü memela. Spain nung US indang military bases ana lir - Naval Station Rota aser Moron Air Base.

Spain Ato Kilonser Pedro Sánchez-i osangbener dang, "Onoki emails nung ajemdaker meinyaker. Onoki iba amala maparen nung United States sorkar official documents nung inyaker aser official positions agiba nung ajemdaker inyaker," ta ashi.

Spain teti tembar tem den teka amtepa alitsü temlungtetba nung lir, saka teti international law indang framework kübok inyaker, ta Sánchez-i ashi.

UK Ato Kilonser Keir Starmer-ia rara mesüra US-i tang Iran rongnendak tesemtem mokdanga aliba nung shilem tuluba agitsü ya UK tejangraba masü ta ashir. Strait of Hormuz nung tenük yoker Iran nung tesem balala amaktsü atema UK-i US dang British bases ashitsü mela aser Iran indang drones khazüka yokba mission nung RAF

tayimtsü temi shilem agia lir. UK, France aser dangar temi ceasefire sülen mesüra rara tembangba sülen Strait of Hormuz lapoka ayutsü tejangraba lir ta shia lir.

Taoba ita Trump-i NATO ya "one-way street" ka asütsü südi ta teti bilema liasü, ta ashi. "Asenoki parnok kumzüka ayutsü, saka parnoki asenok asoshi kecha meinyaktsü," ta pai zülu.

US ktdangsür yagi internal Pentagon email nungya access, basing and overflight roghts (ABO) ya NATO atema baseline ka dang lir ta ashi.

Amalitep makar ta angatetba nung tayang kepzüker ama email yagi America nung Falkland Islands ama European "imperial possessions" yariba repringshitsü ashi, ta US ktdangsüri ashir.

Falklands dang Argentina nung Malvinas ta ajar aser item asetkong ya UK nungi mile 8,000 aser mainland Argentina nungi mile 300 shi pilar lir.

Argentina-i mapang talangka nungi item asetkong ya par

meyong ka kubur kuma jembia arur, koba south-west Atlantic Ocean nung British overseas territory ka lir. Argentina sepa teti 1982 küm item asetkong ya amakba sülen iba ken o mechi linük ana ya rara ka rara lir.

Ano email nungya linük tasak tem alliance nung tongtipang jenjang nungi suspend sütsütsü shia lir ta ktdangsüri ashir.

Ktdangsüri ashiba agi, memo nungya alliance nungi US ainshitsübo shia mali mesüra Europe nung aliba bases tem shibangtsüa shia mali.

Iba osang prokshiba sülen Pentagon Press Secretary Kingsley Wilson-i ashiba agi, US-i NATO allies asoshi ajak inyajakka onok asoshibo parnok meliasü.

"Asen allies tem ya 'paper tiger' ka masü saka par shilem shidak inyakdaktsütsü asoshi War Department-i tir nem lenmang tajung sayutsü, ta lai ashi. Iba atema onoki jembiba indang tangbo kecha mashitsü, ta Wilson-i ashi.

Turkish Grand Prix ayongzüksü mulungtepogo

Istanbul, Rongchii/April 24 (Agencies): Turkish Grand Prix, koba 2021 küm tatema ayongzüka liasü, iba sentong Formula 1 calendar dangi meyipa arutsü renema küm pongu tezüingzüktep ka yangluogo, koba 2027 nungi 2031 tashi alitsü. Turkish Automobile Sports Federation ya tarutsü sentong nung Formula 1 indang delivery partner ama inyaktsü.

Turkish GP ya tesüsa 2020 aser 2021 nung ayongzüik, kong Lewis Hamilton-i 2020 küm Drivers' Championship tenet buba ngua Michael Schumacher-i yanglua aliba otsü den sako akum.

2005 küm F1 calendar nung Istanbul Park aden aser alima nung kanga sapuba circuits rongnung ka akum. Kilometer 5.33 talang layout nungya gari lenmang ajungketba kanga melenshia aliba ajanga gari anir sempet aser gari tashi tendanga liasü.

Istanbul Park nung tesüsa takok angur ya 2021 küm Valtteri

Bottas-i Mercedes-AMG Petronas Formula 1 Team nungi liasü. Tang gari anishir tem rongnungi Turkish GP akoker Hamilton tena kisüing lir.

Turkey nung GPs toku ayongzüka lir aser iba tesem ya teams, drivers aser fans temi kanga menungra liasü.

Iba circuit nung timtiba takok anguba otsü ya taoba mapang Brazil nung driver Felipe Massa-i bena lir, shiba Scuderia Ferrari nung 2006 aser 2008 tsüingta asemen atongtepa takok ang. Ano iba track nung Kimi Räikkönen, Sebastian Vettel aser Jenson Button nungeria takok ngua lir.

Turkey nung F1 maneni ainer, aser iba saisapong indang fans 19 million dak tema lir aser social media followers 7.5 million dak tema lir.

"Alima nung tajungtipa saisapong sentongtem rongnung F1 ya ka lir. Asen linük nunga tanur tain ajungai F1 repringner," ta Turkey Tir Recep Tayyip Erdogan-ia ashi.

2026 FIFA World Cup nung Iran asayatetsü: US

Washington, Rongchii/April 24 (Agencies): 2026 FIFA World Cup nung Iran nung asayartem shilem agitsüba nung Washington-i tai mapur, saka asayar temi Iran indang Islamic Revolutionary Guard Corps (IRGC) den sendaktepa aliba nisungtem anir arutsü memelatsü, ta US Secretary of State Marco Rubio-i ashi.

United States aser Israel nati Iran den February 28 nü rara tenzüka sülen taküm iba asayamung nung Iran shilem agitsü teimla makai akum, kechiaser par linük indang group-stage matches tem ajunga United States nung asayatsü lir.

"Parnok marutetsü ta US nungi kecha shia mali," ta Rubio-i osangbener dang ashi.

"Iran den tebilemetsü ya par saisapongertem den masü. Ibai nisung kar parnok den anir arunüa alirtem den alitsü, kechiaser parnok kar IRGC den tesendaktep lir. Asenoki parnok marudaktsütsü, saka asayartem masü," ta Rubio-i ashi.

"Parnoki IRGC kiralongrar tem asen linüki anir arua parnokji osangbener aser athletic trainers ama senzütsü memelatsü," ta Rubio-isa ashi. Washington-i IRGC nem "foreign terrorist organisation" nungja agüja lir.

Rubio den külemi US Tir Donald Trump-i jembidanga par administration-i saisaponger dak mokongshiner ta ashi.

World Cup ya June 11 nungi US, Mexico aser Canada nung tenzüksü lir.

Iran sorkar indang odongtar Fatemeh Mohajerani-i Bodhbarnü sangdong ka nung,

iba asayamung nung Iran team shilem agitsü asoshi nungdakba maparen ajak Ministry of Sports and Youth nem nungloktsüogo, ta ashi.

World Cup asayatsü asoshi asemen atongtepa qualify mesütetba Italy yagi taküm World Cup nung Iran melentsüla, ta Trump asoshi envoy katibo shia lir.

Italian-American Paolo Zampolli, shiba US envoy for global relations inyaker, pai iba o ya Trump aser FIFA Tir Gianni Infantino dang shiogo, ta ashi.

"Ni Italian native ka lir, aser US-i ayongzüka asayamung ka nung Azzurri repringtsüji bongmang amai lir. Titles pezü lir asünung, parnok adentsü tetemsü," ta Zampolli-i hopta tetenzüklen shia liasü, shiba World Cup mesüra Italian football den kecha tesendaktep mali.

Italian Sports Minister Andrea Abodi-i iba tangatetba ya tim masü ta arütsü aser Economy Minister Giancarlo Giorgetti-ia ibai taaktsü mapa lir ta ashi.

Iran ya World Cup pezü buba asoshi taoba küm qualigy asü, saka rara tenzüka sülen FIFA dang par group matches asem ya US nung masü Mexico nung asayatsü mepishia liasü, koba magizük. Tang Iran ya pari sentong yanglua aliba ama inyaker mesük ajiteter.

"Onok World Cup atema renemshir aser nungdakba ajak anepalur, saka ktdangsür telemtetba nung onok tashi angar," ta Iranian football federation tir Mehdi Taj-i Bodhbarnü Tehran nung sorkar bhukuma rally ka alidak ashi.

BILEMDANGANG

"Tera meteta alir junga jembishinür, aika meteta aliri kangabo mejembir."